

FÄDERCHLEID

Intro sie hei so viu wunderbari Ziele i ne Waag gleit
 bumm - wieder isch der Tag eis

1. Strophe vergässeni Gschichte
 vo vergässene Dichter
 wo unger Trümmerteili liege
 i dräckige Chischte

 gschriebe vo üs
 vo wächselnde Gsichter
 i gseh se no im Cherzeliecht
 mit Tubefädere chritzle

 ihres Liecht isch lang erlosche
 d Fädere hei witer gschwunge
 Zile säuber witer gspunne
 bis e Tube isch entsprunge und sie...

Refrain flügt uf
 und leit sech i Wind
 wo dür das Fäderchleid gleitet
 und so treit se der Sinn

 vo tuusig Fädere gwobe
 gseh se lüüchte dert obe
 und ihre Geischt läbt uf

 mir wüsse Friede isch gross
 über Chrieg und der Tod
 das hei mer aus mau gschriebe
 und verzeit übercho

 en ewige Kreis
 wo mer Rundine spinne
 bis nümme anders blibt aus wieder vore
 es geit wieder vo vor

2. Strophe es si di fautsche aute Fahne
 imene fautsche aute Biud
 gö i de fautsche aute Bahne

hinger em fautsche aute Schiud
u trample über di Pfade und hei d Schwärter scho zücht
da wärde fautschi auti Ahne mit frömde Fädere gschmückt

und sie seit es geit mi nüt a
i ha mit mir säuber z tüe, mues für mi und so...
und är seit es geit mi nüt a
la mi si, i bi frei, bruuche nüt... aha

Refrain *Wiederholung*

Bridge und wenn das aus mau vilech vergheit im Sog
mir chöi das aus haub wieder chli id Ornig bercho

und wenn das lut-haus wirblet mit Wuet und Sorg
mir chöi das aus ablege und der Friede wird cho

mir chöi das aus haub wieder chli id Ornig bercho
mir chöi das aus ablege und der Friede wird cho

Refrain mir si so oberverträumt
hei so viu Chüssi bercho
dass mir hie aus haut vilech
uf di Liechti hei gno

und wo der Tonner ertönt
dunkli Wuuche si cho
mir us em Haubschlaf tribe
u nid wüsse (wieso)

sie breitet d Flügu us
und leit sech i Wind
wo dür das Fäderchleid gleitet
und so treit se der Sinn

vo tuusig Fädere gwobe
gseh se lüüchte dert obe
ihre Geischt läbt uf
höch überem Bode

WIE? ABER WAS?

1. Strophe i wott niene blibe wo der Himu nüm erkennbar
drum hani e Wohnig z mitz drin u z oberst obe und
hani mau e Stung de muesi hie eifach use wüu
hie i au däm Züüg fäut mer irgendwie der Bode

es Läbe uf em Land isch woni mi derna sehne
aber dört fäut mr das wasi ha i mire Stadt
i wett niene häre woni nüt u niemer kenne und
da woni iz bi hani langsam aui satt

di Frou woni mis Härz teile di nimmst so vii Platz i
doch i bine Free-bird mi chame nid zähme
würd am liebschte furt aber i cha nid alei si
wüu bini alei de faht sie mir afa fähle

Refrain es würd sech ergä würdi mi mau entscheide
aber so entscheide das machi eifach nid
du hesch zwöi Wäge wele wäusch vo de beide?
fragi mi nüm i vergrabe mi iz hie

2. Refrain i wett au dä Shit woni ha eifach wäg ha
i gloube au dä Bsitz womer trage isch e Fluech
dä bingt üs nur zrüg drum gibi aues wäg - fasch
nur weisi haut nid wasi speter mau no bruuche

und sowieso dä Job hindret mi vo mir Bestimmig
jage nur e Woustand - doch das bi nid ig
guet mini Bestimmig hani no gad nid gfunge
im Momänt hani ke Zit und ohni Stutz geit das nid

bruuche nüt, nur gloube u hoffe
i cha wähle - ha d zügu i de häng
i bi frei, d wäut steit mer offe
auso muesi hie iz links oder rächts?

Refrain *Wiederholung*

Outro auso blibi eifach hie und ändere mi nie
la se haut la zieh und blibe gad mau hie
auso lanis si und es blibt e Phantasie
wüu i gsehs scho vor mer es wird vii z kompliziert

OLD DAYS

1. Strophe rede mir iz scho über Old Days?
 au di Schätz wo mer groubt hei
 jage ne Hirsch bringne stouz hei
 Drumbeats ufme Houzbei
- ha Granit bisse - ok
 böse Wouf-ey Buuch vou Steine
 di Pokäu wo mir nid ghout hei
 mir wachse bsungers we mir kei Erfoug hei
- siebe Zile und es Goudgame
 au di Lüt wo a mi gloubt hei
 so viu züüg i das Boot gheit
 bis mis Glück sech verdrückt über Board geit
- mir isch irgendwie nach Action
 si luegt mi a seit 'was hätsch gärn?'
 när dä Blick wine Captain
 du bisch us mim Läbe nümme wäg z danke
- i ha glehrt sit gad mini erschte Baarthaar füre
 mittlerwile chani di mit mine Baarthaar gspüre
 es Läbe lang amene Fahrplan bügle
 u när bir 2. Kurve us der Fahrbahn - flüge
- lug das isch mi einzig Plan
 i cha nur das, füeu mi nidemau so einzigartig
 - mis Läbe het mi früe prüeft
 ha i Waud gschreit, es het zrüggrüeft
- Prechorus ey, wär weiss?
 warum het mir hie niemer zeigt wis geit
 versteisch?
 geng wes när scho z spät isch weisi Bscheid
- wär weiss?
 warum het mir hie niemer zeigt wis geit
 was geit?
 wohäre geit hie eigentlech die (Reis)

Refrain was weisi scho?
und wo fani iz a?
und wie wird äch us au däm Bläch
e Meischer bout?

was heisst Erfoug?
hie isch aues Freestyle
ig ernenne ne zum Lifestyle
lug är steit mer no

2. Strophe bewusst si, när Fokus
reduzierte Gnuss, i wirdes nie chönne

Lifestyle isch nur es Design über aus gleit
wo eim hie zuefällig abgeit
haut eis fautsch haub d Chraft verlore aber
we du mi nid liebsch isch mi Saft vergore

hane Stimm im Off und oft gfloge
es isch sone viu z liechte Stoff woni bi gwobe
es macht mi müed das Ross so wit obe
wet der Hoff Gä, truurig bsoffe am

Schluss hei ächt en Ahnig
doch we der Vorhang gheit isch äbe z spät für z Plane
genau iz isch üsi Showtime
nenn' der Wäg da füre Freestyle

Prechorus *Wiederholung*

Refrain *Wiederholung*

was weisi scho ?
und wo fani iz a?
und wär seit wie me us däm Ding
e Meischer bout?

was heisst Erfoug?
hie isch aues irgendwo
chli irgendwie chli Freestyle
ig ernenne ne zum Livestyle
lug är steit mer no

HAUTE COUTURE

1. Strophe i mues säge das gseht nice us
 u het e feine Geissgruch
 u dä Blaizer sehr schön
 u dini Haar si sehr Föhn
- das isch aus Haute Couture?
 isch di Peuz vome Fuutier?
 steu der vor was das choschtet
 hey hei mer scho proschtet?
- dir chömet u dir redet eloquanter
 über Wirtschaftswachstum u Ränthe
 während i mi Schnabu häbe wine Änte
 liiret dir vo de Börsetendänze
 u vo Solvänze
- und i ha sone gratis Gin no pendänt
 und ihri wisse Zähne die glänze
 während mir der Chäuner geng nacheschänkt
 i gloube dä macht das unändlech
- gloub mues ne stoppe
 doch dä Wii chasch nid toppe
 u mit so Lüt bini säute
 wo offesichtlech au öppis gäute
 lose zue und dänk mer...
- Refrain i bine verlorene Planet
 ime frömde Sunnesystem
 aber gross wie me d Stadt hie obe gseht
 und i finge die Liechtli so schön
- we eim der Lift nur gnue höch ufe fahrt
 de geits
2. Strophe dini Klunker Swarovski
 i trage hüt Pantoffli
 i ha dänkt a euem Fescht sig das gmüetlech
 doch i ha gmerkt es isch gar nid so üeblech

hie si aui so dressed up
sehr noble Festakt
i bi mer das gar nid so gwöhnt gsi
u dä Chäuner verdammt dä verwöhnt mi

me cha au die Glas gar nid zeue
während si verzeue
si hei der Chopf vou züüg us em Gschäft i
ha mi Chopf mittlerwile i de Hüppli

die intressiere sech au für dä Stuss da
i mues früschi Luft ha
ou langsam dräits mer
u das Chnoblisüppli bläit mr
risse d Baukontür uf es blinket
ignoriere des Ghüül es windet - mir iz Gsicht und i gseh

Refrain i bine verlorene Planet
ime frömde Sunnesystem
aber gross wie me d Stadt hie obe gseht
und i finge die Liechtli so schön

we me einisch so wit obe da isch acho
de ghört me nid mau meh der Lärm
es git nüt zwüsche mir u däm Himu
aber i ghöre nid unger dä Stärn

we eim der Lift nur gnue höch ufe fahrt
de geits

Outro sone höchi Gseuschaft steut kei Frag
si steut sech o nid a
we eim der Lift nur gnue höch ufe fahrt

sone höchi Gseuschaft steut kei Frag
me geit sech o nüt a
we eim der Lift nur gnue höch ufe fahrt